

plant pa do ri. Vergès li minm la raport in parol dan in kongrè vèr lé zané 70 : « Si in pèp i plant pa son manzé, li lé pa in pèp, li lé pa lib ». Lé normal sa. Premié zafèr pou tyin debout sé lo manzé. Mwin lé dan in lidé kom sa. Sé sa ki port a mwin, é ki fé mon langazman pou domoun. Pou mwin lé normal, mwin lé kom in lespès média, mwin lé au sant, in lintermédyèr pou partaz tout sa mwin lé pou di la ; é i ral pa mwin fé in morso pou fé in morso, zis pou ranpli ; i fo le morso i trap a mwin, i kontant a mwin ; premié plézir sé sa : zoué ek lé mo, pran le tan d'zoué lé gayar, lé mazik. Mi di domoun mi fé mon rol, mi pé èt mazisyin pandan i zoué, nou défoul, nou lé an lèr, mi ral a ou, mi anvout a ou, mi fé giny lespri, mi fé ri a ou, mi fé kap kap a ou... Kan lé fini, mwin sé in moun kom in ot.

Koz kreol sé pa in fèrmtir.

Mwin lé angazé dan la lang. Kan mi koz kréol dann biro, kan mi fé in morso an kréol, kan, dopi 15 an, mi ranpli mon bann sèk labank an kréol ; minm kan domoun i vé fé in kontra èk mwin : la, mi koz pa larzan dabor, mi vé i fé in kontra kom nou la kozé dann téléfone. Na bonpé i demann si nana in modèl an kréol ; mi ve pa in modèl, mi ve ou ékri a li kom nou la kozé : « i fé tan, i zoué tèl èr, tèl zour, lé réglé ». Na dé trwa, la esèy mèt in modèl, la ou wa koman nou lé lwin ; kan domoun i apèl a mwin, i di : « est-ce que je pourrais parler à monsieur Danyel Waro ? » ; mi di « sa a mwin sa » é la, li arvyin an kréol « a ! sa a ou sa daniel ? ou zoué pou konbyin ? » ou byin « roulèr koman i fé ? ». Mi di : « avan kontinié, na in zafèr i kol pa, ou la atak a mwin koman ou la ? ». Na in pé i konpran pa kosa mi demann. Mi souvyin, vèr 90 parla, in lédukatris i di a mwin son zanfan i koz fransé é

i koz pa di tou kreol, é li razout « pourtan mi anway a li avèk la nènènn tou lé mérkrédi » ; dan in fraz kom sa, ou nana foto la rényon. Mé atansion ! Ou na in ot problèm. Nana domoun i di « pou fé sié zorèy la, mi sa koz kréol » mi di non. Sé dan sak ou va dir a li ke ou règ son kont ; mé sé pa parske ou koz kréol ou fransé ke ou sa réglé. Tou lé zour sé in batay pou la liberté ; RFO i invit a mwin pou in lémisyon avèk bann Honoré, Sam long, Carpanin ; mi demann koman i koz ? I di « i koz kréol, mé Sam Long i koz fransé », alor mi di non, mi vé in lémisyon ousa i koz kréol. An plis, si sé bann kamarad i fé. Souvan défwa, mwin lé an raz ; mi wa bann militan koz kreol mé kan kaméra i tourn si zot, i koz fransé. Mi trouv sa lé insolan, méprizan. Ou pé ékri tout liv ou vé mé si ou tonm dan in zafèr kom sa ou désann. Le pli gran militan sé le boug i koz kréol tou lé zour.

Tipa tipa, va ariv fé konprann domoun koz kréol sé pa in fèrmtir, o kontrèr, sé reprann la valèr. Mi ve nou devyin in moun ; nou lé pa domoun totalman, lo trwakar lété zésklav, lété pa domoun, sa i fo le tan pou sa.